



# ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԳՆՈՒՄՆԵՐԻ ԲՈՂՈՔԱՐԿՄԱՆ ԽՈՐՀՈՒՐԴ

ք. Երևան

05.10.2017թ.

## Ո Ր Ո Շ ՈՒ Մ

ՀՀ գնումների բողոքարկման խորհրդի

թիվ ՍՑ-ԷՍ-2017/14

Հայաստանի Հանրապետության գնումների բողոքարկման խորհուրդը (այսուհետ՝ նաև խորհուրդ)՝ ուսումնասիրելով Հայաստանի Հանրապետության ֆինանսների նախարարության 16.06.2017թ. թիվ 03/27-1/10921-17 գրությամբ «Երևանի սննդի կոմբինատ» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված պաշտոնական ընթացակարգով ներկայացված հիմքերը, պարզեց հետևյալը.

### 1. ՀՀ ֆինանսների նախարարության ներկայացրած փաստերը և պահանջը.

ՀՀ ֆինանսների նախարարությունը, ՀՀ արդարադատության նախարարության 17.05.2017թ. թիվ 40/11-2317 և 05.06.2017թ. թիվ Ե-40/11-2317 գրությունների հիման վրա, 16.06.2017թ. թիվ 03/27-1/10921-17 գրությամբ ՀՀ գնումների բողոքարկման խորհրդում նախաձեռնել է «Երևանի սննդի կոմբինատ» ՍՊԸ-ին (այսուհետ՝ նաև Ընկերություն) գնումների գործընթացին մասնակցելու իրավունք չունեցող մասնակիցների ցուցակում (այսուհետ՝ նաև Ցուցակ) ներառելու պաշտոնական ընթացակարգ:

ՀՀ ֆինանսների նախարարությունը պատշաճ ծանուցվել է խորհրդում անցկացվող նիստերի ժամանակացույցի վերաբերյալ, սակայն նախարարության կողմից լիազորված որևէ ներկայացուցիչ չի ներկայացել:

**2. ՀՀ արդարադատության նախարարության ներկայացրած փաստարկները և դիրքորոշումը.**

ՀՀ արդարադատության նախարարության քրեակատարողական վարչությունը 17.05.2017թ. թիվ 40/11-2317 գրությամբ դիմել է ՀՀ ֆինանսների նախարարությանը՝ հայտնելով հետևյալը.

«Սույն թվականի ապրիլին սննդամթերքի ձեռքբերման նպատակով կազմակերպվել է «ԳԱԿ-ՇՀԱՊՁԲ-15/12-ԲԿՎ(17)-2» ծածկագրով շրջանակային համաձայնագրերի միջոցով գնման ընթացակարգ, որին հայտ է ներկայացրել «Երևանի սննդի կոմբինատ» ՍՊԸ-ն (ՀՎՀՀ 06900805): Համաձայն ՀՀ ԿԱ ՊԵԿ-ի կողմից տրամադրված եզրակացության՝ վերոնշյալ ընկերությունը հայտը ներկայացնելու օրվա դրությամբ ՀՀ պետական բյուջեի նկատմամբ ունի ժամկետանց հարկային պարտավորություն:»:

Պատվիրատուն 05.06.2017թ. թիվ Ե-40/11-2640 գրությամբ ՀՀ ֆինանսների նախարարությանն է ներկայացրել նաև Ընկերության հայտը ներկայացնելու ամսաթիվը պարունակող փաստթղթուղթը, ՀՀ պետական բյուջեի նկատմամբ ժամկետանց հարկային պարտավորություններ ունենալու վերաբերյալ հարցման պատճենը և գանահատող հանձնաժողովի նիստերի արձանագրությունները:

Պատվիրատուն պատշաճ ծանուցվել է Խորհրդում անցկացվող նիստերի ժամանակացույցի վերաբերյալ, սակայն վերջինիս կողմից լիազորված որևէ ներկայացուցիչ չի ներկայացրել:

**3. «Երևանի սննդի կոմբինատ» ՍՊԸ-ի ներկայացրած փաստարկները և դիրքորոշումը.**

Խորհուրդը դիմել է «Երևանի սննդի կոմբինատ» ՍՊԸ-ին՝ հնարավորություն տալով ՀՀ ֆինանսների նախարարության կողմից 16.06.2017թ. թիվ 03/27-1/10921-17 գրությամբ Խորհրդում նախաձեռնված պաշտոնական ընթացակարգի վերաբերյալ ներկայացնել

Ընկերության դիրքորոշումը, սակայն վերջինիս կողմից որևէ գրավոր դիրքորոշում չի ներկայացվել:

Խորհրդում նախաձեռնված պաշտոնական ընթացակարգի քննության նպատակով տեղի ունեցած նիստերին մասնակցում էր Ընկերության լիազորված անձ Սահակ Մանուկյանը:

**4. ՍՑ-ԷՍ-2017/14 պաշտոնական ընթացակարգի քննության համար էական նշանակություն ունեցող փաստերը, Խորհրդի հիմնավորումները և եզրահանգումը.**

Խորհուրդն ուսումնասիրել է ՀՀ ֆինանսների նախարարության 16.06.2017թ. թիվ 03/27-1/10921-17 գրությունը և կից փաստաթղթերը, ՀՀ արդարադատության նախարարության քրեակատարողական վարչության 17.05.2017թ. թիվ 40/11-2317 և 05.06.2017թ. թիվ Ե-40/11-2317 գրությունները, «ԳԱԿ-ՇՀԱՊՁԲ-15/12-ՔԿՎ(17)-2» ծածկագրով շրջանակային համաձայնագրերի միջոցով գնման ընթացակարգ հրավերը (այսուհետ՝ նաև Հրավեր), «Երևանի սննդի կոմբինատ» ՍՊԸ-ի Ընթացակարգին ներկայացված հայտը, «ԳԱԿ-ՇՀԱՊՁԲ-15/12-ՔԿՎ(17)-2» ծածկագրով շրջանակային համաձայնագրերի միջոցով գնման ընթացակարգի գնահատող հանձնաժողովի (այսուհետ՝ նաև Հանձնաժողով) 18.04.2017թ. ժամը 11:00-ին կայացած նիստի թիվ 2 և 25.04.2017թ. ժամը 12:00-ին կայացած նիստի թիվ 3 արձանագրությունները, ՀՀ կառավարությանն առընթեր պետական եկամուտների կոմիտեին (այսուհետ՝ նաև Կոմիտե) 18.04.2017թ. կատարված հարցումը և Կոմիտեի կողմից 20.04.2017թ. ներկայացված եզրակացությունը, Պատվիրատուի կարծիքը և դիրքորոշումը.

ՀՀ արդարադատության նախարարության քրեակատարողական վարչությունը սննդամթերքի գնման նպատակով կազմակերպել է «ԳԱԿ-ՇՀԱՊՁԲ-15/12-ՔԿՎ(17)-2» ծածկագրով շրջանակային համաձայնագրերի միջոցով գնման ընթացակարգ (այսուհետ՝ նաև ընթացակարգ):

Ընթացակարգի 1-ին չափաբաժնին մասնակցելու նպատակով «Երևանի սննդի կոմբինատ» ՍՊԸ-ն ներկայացրել է հայտ:

Ընկերությունը ընթացակարգին մասնակցելու նպատակով ներկայացված հայտի N 2 հավելվածով՝ ընթացակարգին մասնակցելու նպատակով հրավերով սահմանված մասնակցության իրավունքի պահանջներին իր տվյալների համապատասխանության մասին հայտարարությամբ, հայտնել և հավաստել է, որ հայտը ներկայացվելու օրվա դրությամբ չունի ժամկետանց պարտքեր Հայաստանի Հանրապետության հարկային և պարտադիր սոցիալական ապահովության վճարների գծով:

Հանձնաժողովի 18.04.2017թ. ժամը 11:00-ին կայացած նիստի թիվ 2 արձանագրության 4.2 կետով «Երևանի սննդի կոմբինատ» ՍՊԸ-ն Ընթացակարգի 1-ին չափաբաժնի մասով ճանաչվել է առաջին տեղն զբաղեցրած մասնակից:

Նույն արձանագրության 4.4 կետով Հանձնաժողովը որոշել է Կոմիտեին ներկայացնել հարցում՝ ընթացակարգի առաջին և հաջորդ տեղն զբաղեցրած մասնակիցների՝ Հայաստանի Հանրապետության պետական բյուջեի նկատմամբ հայտը ներկայացնելու օրվա դրությամբ ժամկետանց հարկային պարտավորությունների, ինչպես նաև Կարգի 67-րդ կետով նախատեսված որակավորման պահանջի առկայության վերաբերյալ:

Կոմիտեի կողմից 20.04.2017թ. տրամադրված եզրակացության համաձայն՝ «Երևանի սննդի կոմբինատ» ՍՊԸ-ն հայտը ներկայացնելու օրվա՝ 18.04.2017թ. դրությամբ ՀՀ պետական բյուջեի նկատմամբ ունեցել է 25.960.104 ՀՀ դրամ գումարի չափով ժամկետանց պարտավորություն:

25.04.2017թ. ժամը 12:00-ին կայացած նիստի թիվ 3 արձանագրության 1.1 կետով Հանձնաժողովը որոշել է «Երևանի սննդի կոմբինատ» ՍՊԸ-ի հայտը մերժել՝ հայտը ներկայացնելու օրվա դրությամբ ՀՀ պետական բյուջեի նկատմամբ ժամկետանց պարտավորություն ունենալու հիմնավորմամբ:

ՀՀ կառավարության 10.02.2011թ. N 168-Ն որոշմամբ հաստատված «Գնումների գործընթացի կազմակերպման» կարգի՝

- 35-րդ կետի 1-ին ենթակետի «բ» պարբերության համաձայն՝ մասնակիցը հայտով ներկայացնում է իր կողմից հաստատված հայտարարություն՝ օրենքով նախատեսված մասնակցության իրավունքի և հրավերով սահմանված որակավորման չափանիշներին իր համապատասխանության մասին,

- 47-րդ կետի 1-ին ենթակետի համաձայն՝ հայտերի բացման նիստի ավարտին հաջորդող աշխատանքային օրը հանձնաժողովի քարտուղարն էլեկտրոնային եղանակով ՀՀ ԿԱ պետական եկամուտների կոմիտե հարցում է ներկայացնում առաջին և հաջորդաբար տեղ զբաղեցրած մասնակիցների՝ Հայաստանի Հանրապետության պետական բյուջեի նկատմամբ հայտը ներկայացնելու օրվա դրությամբ ժամկետանց հարկային պարտավորությունների, ինչպես նաև նույն կարգի 67-րդ կետով նախատեսված որակավորման պահանջի առկայության վերաբերյալ՝ ներկայացնելով հարկ վճարողի հաշվառման համարը,

- 48-րդ կետի համաձայն՝ ՀՀ ԿԱ պետական եկամուտների կոմիտեն նույն կարգի 47-րդ կետի 1-ին ենթակետով նախատեսված հարցումն ստանալու օրվան հաջորդող երկու աշխատանքային օրվա ընթացքում էլեկտրոնային եղանակով պատվիրատուին տրամադրում է հարցման մասին եզրակացություն: Եթե տրամադրված եզրակացության արդյունքում մասնակցի ներկայացրած հայտարարությունները որակվում են իրականությանը չհամապատասխանող, ապա՝

- 1) հայտերի գնահատման արդյունքների հրապարակման նիստում հանձնաժողովի որոշմամբ տվյալ մասնակցի հայտը մերժվում է, և

- 2) այդ մասնակցի տվյալները գնման գործընթացին մասնակցելու իրավունք չունեցող մասնակիցների ցուցակում ներառելու գործընթաց նախաձեռնելու նպատակով ի հայտ եկած հանգամանքների մասին տեղեկությունները պատվիրատուի կողմից ուղարկվում են Հայաստանի Հանրապետության ֆինանսների նախարարություն՝ դրանց ի հայտ գալու օրվան հաջորդող երեք աշխատանքային օրվա ընթացքում:

- 125-րդ կետի 1-ին ենթակետի համաձայն՝ Օրենքի 5-րդ հոդվածի 2-րդ մասով նախատեսված՝ գնումների բողոքարկման խորհրդի ընդունած որոշման հիման վրա մասնակիցը գնումների գործընթացին մասնակցելու իրավունք չունեցող մասնակիցների ցուցակում ընդգրկվում է 6 ամիս ժամկետով, եթե ավելի քան մեկ անգամ խախտել է պայմանագրով նախատեսված կամ գնման գործընթացի շրջանակում ստանձնած պարտավորությունը, որը հանգեցրել է պատվիրատուի կողմից պայմանագրի միակողմանի լուծմանը կամ գնման գործընթացին տվյալ մասնակցի հետագա մասնակցության դադարեցմանը, որի հետևանքով տուժանքի, հաշվարկված վնասի,

տույժի կամ տուգանքի չափը չի գերազանցում գնումների բազային միավորը և մինչև բողոքարկման խորհրդի կողմից համապատասխան որոշում ընդունվելը՝ պատճառված վնասը, հաշվարկված տույժը կամ տուժանքը վերականգնվել է կամ, եթե Հայաստանի Հանրապետության պետական բյուջեի նկատմամբ հայտը ներկայացնելու օրվա դրությամբ ունեցել է ժամկետանց հարկային պարտավորություններ կամ որակավորման չափանիշների, իսկ ապրանքների գնման դեպքում՝ նաև տեխնիկական բնութագրերի գնահատման արդյունքում այդ որակավորման չափանիշները կամ տեխնիկական բնութագրերը որակվել են որպես մասնակցի կողմից ներկայացված հայտարարություններին չհամապատասխանող:

Այսպիսով, Խորհուրդն արձանագրում է, որ «Երևանի սննդի կոմբինատ» ՍՊԸ-ն ընթացակարգին մասնակցելու նպատակով հայտը ներկայացնելու օրվա՝ 18.04.2017թ., դրությամբ ունեցել է ՀՀ պետական բյուջեի նկատմամբ ժամկետանց պարտավորություն:

«Գնումների մասին» ՀՀ օրենքի (այսուհետ՝ նաև Օրենք) 5-րդ հոդվածի՝

- 1-ին մասի 2-րդ կետի համաձայն՝ գնումների ընթացակարգերին մասնակցելու իրավունք չունեն անձինք, որոնք ունեն ժամկետանց պարտքեր Հայաստանի Հանրապետության հարկային և պարտադիր սոցիալական ապահովության վճարների գծով,

- 4-րդ կետի «բ» ենթակետի համաձայն՝ մասնակիցն ընդգրկվում է գնումների գործընթացին մասնակցելու իրավունք չունեցող մասնակիցների ցուցակում, եթե հայտը ներկայացնելու պահին նախորդող տարվա ընթացքում գնման գործընթացի շրջանակում ներկայացրել է կեղծ տվյալ:

- 2-րդ մասի համաձայն՝ գնումների գործընթացին մասնակցելու իրավունք չընդունող մասնակցի վերաբերյալ ունեցած տեղեկությունների հիման վրա լիազորված մարմինը պաշտոնական ընթացակարգ է նախաձեռնում գնումների բողոքարկման խորհրդում: Տվյալ մասնակցի կարծիքը լսելուց հետո գնումների բողոքարկման խորհուրդը որոշում է կայացնում մասնակցին նույն հոդվածով նախատեսված ցուցակում ընդգրկելու վերաբերյալ: Անձը նշված ցուցակում ընդգրկվում է 6 ամսից մինչև 3 տարի ժամկետով(...):

Խորհուրդը գտնում է, որ Ընկերությունը ընթացակարգին մասնակցելու նպատակով ներկայացրած հայտի N 2 հավելվածով՝ ընթացակարգին մասնակցելու նպատակով հրավերով սահմանված մասնակցության իրավունքի պահանջներին իր տվյալների համապատասխանության մասին հայտարարությամբ, հայտնելով և հավաստելով, որ հայտը ներկայացվելու օրվա դրությամբ չունի ժամկետանց հարկային պարտավորություններ Հայաստանի Հանրապետության հարկային և պարտադիր սոցիալական ապահովության վճարների գծով՝ ներկայացրել է կեղծ տվյալ:

Խորհուրդն արձանագրում է նաև, որ «Երևանի սննդի կոմբինատ» ՍՊԸ-ն 18.04.2017թ. մասնակցության հայտ է ներկայացրել ՀՀ արդարադատության նախարարության քրեակատարողական վարչության կողմից կազմակերպված «ԳԱԿ-ՇՀԱՊՁԲ-15/12-ՔԿՎ(17)-2» ծածկագրով շրջանակային համաձայնագրերի միջոցով գնման ընթացակարգին, իսկ ավելի վաղ, 04.04.2017թ. ՀՀ պաշտպանության նախարարության «ԳԱԿ-ՇՀԱՊՁԲ-15/12-ՀՀՊՆՆՏԱԴ-ՇՀԱՊՁԲ-7/37» ծածկագրով շրջանակային համաձայնագրերի միջոցով գնման ընթացակարգի շրջանակում թույլ է տվել Օրենքի 5-րդ հոդվածի 1-ին մասի 4-րդ կետի «բ» ենթակետի նախատեսված խախտում՝ ներկայացնելով կեղծ տվյալ, որն արձանագրվել է ՀՀ ֆինանսների նախարարության կողմից 08.06.2017թ. թիվ 03/73-1/10313-17 գրությամբ ՀՀ գնումների բողոքարկման խորհրդում «Երևանի սննդի կոմբինատ» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված պաշտոնական ընթացակարգի վերաբերյալ Խորհրդի որոշմամբ:

Ելնելով վերոգրյալից և ղեկավարվելով «Գնումների մասին» ՀՀ օրենքի 5-րդ հոդվածի 2-րդ մասով, 48-րդ հոդվածի 6-րդ մասի 7-րդ կետով, Կարգի 125-րդ կետի 1-ին ենթակետով՝ ՀՀ գնումների բողոքարկման խորհուրդը

## Ո Ր Ո Շ Ե Ց

1. ՀՀ ֆինանսների նախարարության կողմից 16.06.2017թ. թիվ 03/27-1/10921-17 գրությամբ «Երևանի սննդի կոմբինատ» ՍՊԸ-ին գնումների գործընթացին մասնակցելու


իրավունք չունեցող մասնակիցների ցուցակում ներառելու նպատակով խորհրդում նախաձեռնված պաշտոնական ընթացակարգը բավարարել:

2. «Երևանի սննդի կոմբինատ» ՍՊԸ-ին ընդգրկել գնումների գործընթացին մասնակցելու իրավունք չունեցող մասնակիցների ցուցակում՝ վեց ամիս ժամկետով:

ՀՀ գնումների բողոքարկման խորհրդի որոշումն իրավապարտադիր է:

ՀՀ գնումների բողոքարկման խորհրդի որոշումը կարող է բողոքարկվել դատական կարգով:

**ՀՀ գնումների բողոքարկման  
խորհրդի անդամ**



**ԷՄԻԼ ՍԱՐԳՍՅԱՆ**